

Kolosi
Naoa itəm Pol təməte tuwın kəm
iəfak mın ikın Kolosi
Nəghatən əkuəkir rəha naoa u
Kolosi

?Pah təməte naoa u? Aposol Pol təməte naoa u.

?Təməte tatuwın kəm pah? Təməte tatuwın kəm niməfak əpəh Kolosi, taon asol kit əpəh nitən asol Esia.

?Nəmegəhən tahro nulan nian təməte? Katən məmə okəm-naka Epafra təmətuoun niməfak əh Kolosi. Pol təsuwınən məplan niməfak əh, məto iəgətun eiueiua neen kəmotuwa e niməfak. Koatən məmə okotəkəike kətəu-pən suatip neen rəha nagwənən ne nənimən, kən kəfak kəm nagelo mın, moatən məmə Kristo in sənəmə ilis pik. Koatən məmə koatos nitunən neen itəm koatəhluaig, moatən məmə nitunən ne nolən rəha etəmim in nat kit itəm iahgin pik.

?Təməte naoa u o naka? Pol təməte naoa u məmə otoh nəgətunən eiueiua mın itəm koatatig e niməfak. Molkeike məmə otən-iarəp məmə Kristo in ilis taprəkis-in natimnat rafin, kən iəfak mın okəsotagileən e nəgətunən eiueiua mın əh, məto-inu ilat nat əpnəpın əm.

Pol təmətuoun rəhan nəghatən

¹ Io Pol, u io aposol kit rəha Kristo Iesu, itəm Uhgın təmitəpun rəkis io məmə rəhan. Itimlau piətat Timoti etuatig, ² kən nikitimlau tətəgien

məmə iatuəghat kəm itəmat e naoa u, itəm iatuəte matuahl-ipinə kəm itəmat netəmim rəha Uhgın əpəh Kolosi, inu piak mın ne winik mın e Kristo itəm nakotahatətə əskasik lan. Itımlau iatuəfak məmə nəwırən ne nəməlinuən rəha Uhgın Tata rəhatat in otəkəike mətatig otəmat.

Pol təmənwiwi Uhgın o netəm Kolosi

³ Nian ekoatəfak otəmat kəm Uhgın u tata rəha İərəməərə İesu Kristo, kən nian rafin ekoatən tagkiu kəm in o rəhan wək e nəmegəhən rəhatəmat, məto-inu emotətə ⁴ məmə rəhatəmat nahatətəən təkəsik ron ne nolkeikeən rəhatəmat tatuwin o netəmim itəm koatəfak. ⁵ Nahatətəən ne nolkeikeən rəhatəmat tol min-nulan məto-inu nəkotitun wir e nikitəmat məmə Uhgın otos-ipinə kəm itəmat nat naka itəm in təmol əpen-əpenə lan əpəh ilis e nego e neai. Nəmotətə rəkis natımmat mın əh e nəghatən pahrien, inu namnusən təwir rəha İesu Kristo. ⁶ İkin mın e nətueintən u, namnusən təwir tatoe-in noan matəwiə matol wi nəmegəhən rəha netəmim. Tol əm mə inu nian itəmat nəmotətə motitun nıpahrienən əh e nəwırən rəha Uhgın, kən tatəwiə mın matoe e rəhatəmat nəmegəhən. ⁷ Inu suah u Epafiras, tınən rəkis nəghatən u kəm itəmat. In etəmim wir kit itəm tatos rəhatımlau nəghatən. In etəmim kit tatətul əskasik o nolən wək rəha Kristo kən mətasitu etəmat. ⁸ In təmən kəm itımlau nolkeikeən rəhatəmat itəm tatuwin o netəmim itəm Narmın Rəha Uhgın təmos-ipinə kəm itəmat.

⁹ Tol min-nulan, e nian itımat emoatətə namnusən əh, kən ekoatəfak e nian rafin otəmat.

1:4: Efes 1:15-16

1:6: Efes 1:13; 1 Pita 1:4

1:8: Kol 4:12;

FIm 23

Ekoatətapəh-in o Uhgìn məmə in otətəlmin itəmat e rəhan nətəligən ne nenatigən pəs nəkotitun wir nəwian. ¹⁰ Ekoatəfak nulan məmə naliwəkən rəhatəmat otos-ipən nisaiiən kəm Uhgìn pəs tol nikin tətəgien ron. Məto-inu nəmegəhən rəhatəmat tatəe-in noan itəm təwir o wək rafin rəha Uhgìn itəm noatol. Pəs Uhgìn otasitu etəmat məmə nəkotitun wir in. ¹¹ Ekoatəfak məmə nəsanənən asol rəha Uhgìn otol itəmat nakotəsanən e nian nərətən tatuwa. Pəs nəkoatətul əskasik kən nətəligən rəhatəmat təfəməh, kən nagienən tətətig etəmat, ¹² kən nakoatən kəm Tata Uhgìn məmə nikitəmat tətəgien o natimat itəm təmol. In təmol itəmat nəkotətəuatip, məmə nəkotitun nosən nautə rəha Uhgìn itəm otəpanuwa. Onəkotos rəhatəmat nautə tahmen e netəmim rafin itəm koatəfak motaliwək e nəhag-əhagən rəha Uhgìn. ¹³ Kən Uhgìn təmol nəhlan nian in təmİLəs-irəkis kitat e nərəmərəən rəha napinəpən, minol kitat kinotuwa e nərəmərəən rəha Nətīn itəm in tolkeike pik. ¹⁴ Kən nətīn təmīkis kitat e nalpīnən rəha təfagə, inəh təmafəl kitat e təfagə rat mīn rəhatat.

*Kristo in ilis taprəkis-in
natimnat rafin*

¹⁵ Nətī Uhgìn tahmen-pən əm e rəhan tata itəm kol netəmim kəsotəhmən.

Aupən aupən agin, nian nīməptən ne neai ne natimnat rafin kəmoatikə əh, məto Nətīn, in

1:9: Efes 1:16-17 **1:11:** Efes 1:19; 3:16 **1:12:** Efes 1:11,18

1:13: Luk 22:53; Efes 2:2 **1:14:** Efes 1:7

tinimaupən matig rækis, kən tol-pən in, in ilis tatəramərə o natimnat rafin mın u.

16 In ilis məto-inu in təmol natimnat rafin e nətueintən u, ne neai, natimnat itəm katehm ilat o kəsehmən ilat, inəh nagelo mın, ne iərmis mın, ne narmın rat mın, ne iəramərə mın rafin. Kən in təmol natimnat mın rafin u məmə rəhan.

17 Kən in tinimaupən matig rækis e natimnat rafin. Kən natimnat mın rafin koatətig məto-inu nəsanənən rəhan tətəskəlīm ilat.

18 Kən in əm tatətul aupən o niməfak, kən niməfak in tatol wək tahmen-pən e nıpətın, kən in rəhn-kapə.

Kən in nəukəti niməfak, inəh in etəmim itəm in təmaupən məmegəh lilin e nimisən.

Tol nəhlan, in ilis e natimnat rafin.

19 Məto-inu e nəwia Uhgın, nəmegəhən ne nəsanənən rafin rəhan tətətig əm e Kristo, kən Kristo in ilis e natimnat rafin.

20 Kən e Kristo, Uhgın təmələhəu nəməlinuən nian nıta Kristo təmaiu e nig kəməluau, kən netəmim, ne nat megəh mın, ne nagelo mın, ne iərmis mın, ne natimnat rafin kəmotuwa kuəfımın ilat mın e nəramərəən rəha Uhgın.

E Kristo əm Uhgın təmol natimnat mın əh.

21 Aupən ikin, itəmat nəmoatətul isəu o Uhgın, kən itəmat tikimır mın rəhan e nətəligən rəhatəmat, kən nəmoatol təfagə rat. 22 Məto roiu əh, Uhgın təmol məmə itəmat nəmotuwa kol kitiah itəmat mın e nimisən rəha Kristo itəm nıpətın təməkul e

1:15: Jon 1:18; 2 Kor 4:4 **1:17:** Jon 1:1; 8:58 **1:18:** Wək 26:23; Efes 1:22-23; Nol Əpən 1:5 **1:19:** Kol 2:9 **1:20:** Efes 1:10 **1:21:** Rom 5:10; Efes 2:12

nig kəməluau. Uhg̃in təmōl mihin əh lan məmə otos itəmat nakotuwa iuəhk̃ir ron, kən motətuatip e niganəmtin, kən rəhatəmat nolən rat tikə, kən okol suah kit təsən ratən itəmat. ²³ Natimnat min u tol nəhlan okəmə itəmat nəkoatətul əskasik e rəhatəmat nahatətəən e Iesu. Nəmoatəto namnusən təwir itəm tatəgətun natimnat itəm Uhg̃in otol kəm itəmat əpəh e nego e neai, kən rəhatəmat nətəligən otəkəike matətul əskasik e natimnat min əh. Namnusən təwir u, itəm nəmotəto rəkis, kəmamnus-iarəp ikin min e nətueintən, kən io Pol, Uhg̃in təmaun-in io məmə iatən-iarəp namnusən təwir əh.

²⁴ Nīkik tagien məmə ekatəto nahməən e nīpətik o rəhatəmat nahatətəən. Kristo təməto nahməən e nīpət̃in məmə niməfak otaiir. Kən e suatip kit̃iəh əm, io min iatəto nahməən e nīpət̃ik o nīpət̃i Kristo, inu in niməfak, məmə otəwiə məskasik. Kən tol min-nəhlan, wək itəm Iesu təmətuoun, iakolkeike məmə iakasitu e wək rəha Iesu o niməfak, kən matəto nahməən ron.

²⁵ Uhg̃in əm təm̃iləs-ipər io məmə ekol wək e niməfak rəhan. Roiu əh, ek̃itun nasituən etəmat o wək itəm Uhg̃in təmələhəu-pən e nelmək. Rəhak wək məmə iatən-iarəp nəghatən min rafin rəha Uhg̃in pəs nəkot̃itun wir, ²⁶ nəghatən əh in nalpəkau anionən rəha Uhg̃in itəm təmatəhluaig o netəmim rafin aupən ikin, mətō roiu əh Uhg̃in tinuhap̃ik nīpət̃in kəm rəhan netəmim. ²⁷ Kən Uhg̃in nīkin tagien əm məmə otən-iarəp natimnat wir min rəha Iesu kəm itəmat, netəm naihlua min u kəsənən mə itəmat netəm Isrel, məmə onəkot̃itun

1:22: Rom 5:10; Efes 5:27

1:26: Rom 16:25-26; Efes 3:2-9

min. Nalpəkau anionən itəm təwir rəha Uhgın, in tol min-nulan, Kristo təmos nikitəmat, kən nəkotitun motahatətə lan məmə onəkotos rəhan nəwirən itəm təwir agın-əh əpəh e nego e neai. ²⁸ Kən itimat ekoatən-iarəp Kristo kəm netəmim rafin. Kən ekoatən əskasik moatəhgaiir e nikilat, kən moatəgətun ilat e nenatigən wir, məmə ilat kotuwa iəfak min itəm koatətul əskasik e rəhalat nahatətəən e Kristo. ²⁹ Iatol wək əskasik o nat əh, kən e nian rafin iatol wək əskasik pik e nəsanənən asol rəha Kristo itəm tatol wək e nəmegəhən rəhak.

2

Nəkotəkəike motahatətə əskasik e Iesu

¹ Iakolkeike məmə nəkotitun mə iatol wək əskasik pik otəmat netəm Kolosi, ne netəm Laotisia, ne neen min itəm koatəfak məto esəhmən ilat. ² Iatol wək nəhlan o niləs-ipərən nətəligən rəhatəmat rafin, nian itəmat nakotilpin wir nikitəmat məmə nikitəmat otol kitəh əm, kən natimnat min u in tatuwa nian nakoatolkeike itəmat min. Kən iatol wək məmə itəmat rafin onəkotos nitunən təwir itəm otol nikitəmat təsanən, kən in otol min məmə nəkotitun wir nəghatən pahrien rəha Uhgın itəm aupən təmatəhluaig məto roiu tinet-arəp. Kən nalpəkauən anion əh, in Kristo, ³ itəm Uhgın təmərgətain nenatigən ne nitunən wir min rafin rəhan tətətig lan. ⁴ Io iatəghat nulan kəm itəmat o nahtosig-inən nəghatən eiueiuə min rəha netəmim itəm tətəhen o niuw-rəkisən rəhatəmat nətəligən. ⁵ Tol mə etətig pap isəu otəmat, məto nikik tatəht pik itəmat. Kən nikik tagien pik məto-inu eməto

məmə rəhatəmat nətəligən kitiah əm, kən itəmat nakotahatətə əskasik əm e Kristo.

Rəhatəmat nəmegəhən otəkəike mətatig əm e Kristo.

⁶ Məto-inu itəmat nəmos Kristo Iesu məmə in İərəməmə rəhatəmat, kən nəkotəkəike moatətəupən əskasik in. ⁷ Otaskəlīm Kristo tiəkis tahmen e noki nig tateiuaiu mīləs nəptən, kən pəs rəhatəmat nəmegəhən təwiə məskasik lan. Pəs rəhatəmat nahatətən otəkəike məwiə matəskasik e nian rafin, nahatətən inu kəməgətun itəmat lan aupən. Kən nian rafin okotəike moatən kəm Uhgın məmə nikitəmat təməmə mərioah e nagiənən o natimnat itəm təmol otəmat.

⁸ Oatəto wır itəmat məmə netəmim kəsotatuən itəmat e iəgətun eiueiuən rəhalat. Nəgətun eiueiuən əh tatətəupən nətəligən rəha netəmim əm ne nəukəti lou mīn itəm tatəghat-in natimnat rəha nətueintən əm. Nəghatən mīn əh tətisi-pən o nətəligən oas mīn rəha netəmim, məto kəsotisi-pənən o Kristo.

⁹ Kən Kristo in Uhgın. Kən in təmuwa mos nıpəti etəmim tahmen e kitat, kən natimnat rafin rəha Uhgın tətətig lan.

¹⁰ Kən nian nəmotahatətə e Kristo, kən Uhgın in təmos-ipən natimnat rafin rəha nəwırən kəm itəmat. Kən Kristo tətərəməmə e netəmim ne natimnat rafin itəm koatərəməmə e nətueintən ne neai. ¹¹ Kən nat kit mīn e Kristo, nian itəmat nəmotahatətə lan, kən in təməhg-ipən itəmat. Məto sənəmə nəhg-ipənən rəha nıpətin itəm netəmim koatol, məto nəhg-ipənən rəha nikitəmat itəm

2:5: 1 Kor 5:3

2:7: Efes 3:17

2:9: Jon 1:14,16

2:10:

Efes 1:21-22

Iesu tatol. In tæmæte rækis nætelligæn ne nolæn rat min e ræhatæmat næmegæhæn. ¹² Kæn e nian itæm kæmau-tælimin itæmat e næhau, in næmtætïn kit mæmæ næmegæhæn aupæn ræha tæfagæ rat ræhatæmat koatimis kæn katitænim ilat Iesu, kæn Uhgïn tæmæmegæh min e næmegæhæn wi min itæmat Iesu e næmegæhæn ræhatæmat, in æh e nahatætææn ræhatæmat e næsanænæn asol ræha Uhgïn itæm tæmol Iesu tæmegæh min e nimisæn.

¹³ Aupæn ikin, nian Uhgïn tæmæsæte rækisæn æh nolæn rat min e nikitæmat, kæn e niganæmtïn, itæmat næmotimis rækis o nolæn rat min æh. Mæto nian næmotuwa kol kitæh itæmat Iesu, kæn Uhgïn tosmegæh min itæmat min. Uhgïn tæmafæl rækis nolæn rat min ræhatat. ¹⁴ Nian kitat kæmoatol nolæn rat, kæn kæmotæht Lou ræha Moses itæm tatæn mæmæ okotimis o nolæn rat min æh, kæn tatætu-pa nipægnæmti næghatæn min kæm kitat. Mæto Uhgïn tæmæht-ipæn næghatæn min æh e nig kæmæluau, kæn næsanænæn ræhalat tikæ. ¹⁵ E nig kæmæluau-in, Kristo in tæmol win e næsanænæn ræha iæræmære min rafin, kæn tæmærekïn næræmæreæn ræha iærmis min tahmen-pæn mæ in tæmol win elat e næluaginæn asol kit. Kæn roiu æh, in tæmol ræhan tikimïr min kæmotuwa nat æpnarïn æm e niganæmti netæmim.

Iesu tatæræmære etæmat

¹⁶ Tol min-nulan, æsotætelig-inæn næghatæn ræha netæmim itæm kotælæhæu-osig mæmæ nækæsotolæn natimnat neen, mæsotunæn nægwænæn u o mæsotænimæn nat u. Æsotætelig-inæn næghatæn ræhalat itæm koatæn mæmæ nakol natimnat min

u e nian asim min, o e nian rəha məwig wi min, o e nian rəha Sapat. ¹⁷ Lou min u rəhalat itəm koatəghat-in, kotahmen e narmi nat kit itəm otəpanuwa, məto nıpəti natimnat rafin tətatiğ e Kristo. ¹⁸ Netənim neen kotalisit pik məto-inu ilat koatən mə koatehm nəməhlaiirən min neen itəm nıpətilat tatig. Ilat koatən kəm itəmat məmə nəkotəkəike motol natimnat neen itəm tatəgətun məmə rəhatəmat nətəliğan teiuaiu, kən itəmat onəkotəkəike moatəfak kəm nagelo min. Əsotətəu-pənən nətəliğan min rəhalat. Nətəliğan min əh etənim əm tatol. Okəmə nəkoatətəu-pən nəghatən rəhalat, kən onəkotakiəh e rəhatəmat nəmegəhən. Məto-inu netəm min əh koatos-ipər ilat o nat nıpətin tikə. ¹⁹ Netəm min əh kəsotaskəlīmən Iesu tiəkis. Məto Iesu tahmen-pən mə in rəhn-kapə niməfak kənu niməfak in nıpəti Iesu. E nolən kitəh tahmen-pən e nıpəti etənim, itəm tatilpın ikin e noanol min tatuwin e nikiłkilin, kən Iesu tatol mihin əm nat kitəh e niməfak rəhan mə niməfak otəskasik, kən matəwiə e nəmegəhən wir itəm Uhgın tatol tatəwiə.

Nəmotos nəmegəhən wi məto-inu itəmat nəmotol kitəh e Iesu

²⁰ Nian nəmotahatətə e Iesu, in tahmen mə nəmotimis itəmat min. Kən məto-inu lou təsuwinən o etənim itəm təmimis, kən nəukəti lou min itəm tatəghat-in natimnat rəha nətueintən əm, nəsanənən rəhalat tikə məmə okotərəməmə etəmat. Tol min-nəhlan, iatətapəh otəmat məmə, təhro itəmat nəkoatətəu-pən lou min rəha nətueintən ne, inəh nəghatən oas min itəm koatən məmə,

21 “Əsaskəlīmən nat u,” o “Əsun asgəwīnən nat u,” o “Əsekən nat u.” 22 Məto nəghatən mīn u təmisi-pən əm e nətəligən rəha etəmim. İlat koatəghat-in əm natimnat rəha nətueintən u, təhmen-pən e nəgwənən neen, ne nənimən neen. Məto natimnat mīn un, okol təsasituən, kən təsərəkīnən nīkitəmat, məto-inu e nian onəkotos o nakotun, kən tikə mīn. 23 Ekītun mə nian nakoatehm nəghatən mīn əh, nakotəmə kətah nəghatən aɡin-əh mīn neen. İlat koatən məmə netəmim okotəfak mīn-nulan o nəhlan, kən ilat koatən məmə okotol rəhalat nətəligən teiuiu mīn-nulan o nəhlan, kən ilat koatən mīn məmə netəmim okotəike moatehm wīr nīpətīlat mīn-nulan o nəhlan e nolən itəm in tīəkīs o nīpətīlat. Məto iatən-ipīnə kəm itəmat məmə nəghatən mīn əh, rəhalat nəsanənən tikə məmə otahtosig-in nətəligən rat mīn ne nolən rat mīn itəm netəmim koatol e nīpətīlat.

3

1 Məto-inu Uhgīn təmosmegəh mīn itəmat mīn Kristo, kən tol mihīn nəhlan, roiu əh itəmat onəkotəkəike motol nīkitəmat tətətig əskasīk e natimnat itəm tətətig əpəh e nego rəha Uhgīn, ikin əh İesu tətəpələh ikin e nīkali Uhgīn matip, ikin əh, ikin rəha nəsanənən ne nīsiiaiən. 2 İtəmat onəkotəkəike motol rəhatəmat nətəligən tətətig əm e nego rəha Uhgīn, pəs nətəligən rəhatəmat otəsətigən e natimnat rəha nətueintən u, 3 məto-inu itəmat nəmotimīs itəmat Kristo, kən nəmegəhən pahrien rəhatəmat koatəhluaig ilat Kristo itəm tətətig e nego e neai ilau

2:21: Kal 4:3,9; 1 Tim 4:3
16:19; Efes 1:20

2:22: Mat 15:9

3:1: Mak 12:36;

Uhgîn. Nəmegəhən wi u, netəmim kəsotəplanən.
⁴ Nəmegəhən pahrien rəhatəmat in e Kristo əm. Kən nian Kristo otitəlig-pa min, kən Uhgîn otəgətun Kristo kitat min kəm netəmim rafin, kən ilat okotəplan nəwirən ne nəsanənən rəhan.

Suatip ətuatip

⁵ Məto itəmat onəkotəkəike motapəs agîn nolən tərət min rəha nətueintən, nolən tərət tol min-nulan: nīpitan ne nəman ne, koatit anion ilat min; ilat koatol nolən tərət tol naulisən o nənən; ilat koatolkeike pik ilat min o nolən tərət; təfagə rat tepət e rəhalat nətəligən; ilat naumis, kən nolən əh tahmen-pən məmə koatəfak kəm narmi nat min. ⁶ Nolən rat min əh tatol niki Uhgîn tıtahmə, kən in otol nalpınən asol kəm netəmim itəm koatol nolən rat min əh. ⁷ Aupən ikın, nolən rat min əh koatərəməərə e rəhatəmat nəmegəhən. ⁸ Məto roiu əh, nəkotəkəike motos-irəkis ilat e rəhatəmat nəmegəhən, kən tol min-nəhlan: nikitəmat təsaratən; nikitəmat ne nohlitəmat təsatiperəh pikən tahmen e kaluəluə; əsolən tərət kəm netəmim; əsən ratən netəmim; əsənən nəghatən itəm tol naulisən o nənən. ⁹ Soteiuə-inən itəmat min məto-inu itəmat nəmotapeg rəkis nətəligən oas rəhatəmat kən motapəs rəhan nolən min, ¹⁰ kən nəmotuwın-in nətəligən wi. Uhgîn tatos-ipinə nəmegəhən wi u kəm itəmat, matol məmə itəmat onəkotuwa motol əm mə in ne. Kən pəs nəkotitun wir in. ¹¹ Məto e natimnat min əh, in nat əpnapın əm okəmə ik etəm Isrel, o sənəmə

3:3: Mat 6:33 **3:6:** Rom 6:6,11; Efes 4:19; 5:3-6 **3:8:** Efes 4:25-29; 5:4 **3:9:** Efes 4:22,25 **3:10:** Efes 4:24

ik etəm Isrel; okəm kəməhg-ipən ik o kəsəhg-ipənən ik; okəmə nəmöl-wir skul o nəsöl-wirən skul; okəmə ik slef əm kit o ik nakatərəməərə e netəmim. Məto nat asol in Kristo, kən tətətig min e nəmegəhən rəhatat rafin.

¹² Uhgın təmolkeike itəmat, kən mitəpun itəmat məmə rəhan min. Kən tol min-nulan: onəkotəkəike motasəkitun netəmim; motol təwir kəm netəmim; rəhatəmat nətəligən otəkəike mətətig ləhau; itəmat netəm mətig; kən nətəligən rəhatəmat otəfəməh. Otol nəghatən min əh, təhmen-pən mə nakoatuwin-in napən wir rəha Uhgın. ¹³ Nian suah kit otol nat kit otəsahmenən e niganəmtitəmat, kən nikitəmat otəsahmə uəhaiən ron. Okəmə suah kit tatol tərət kəm itəmat kit, pəs in otos əm timis e nikin, məto in otəkəike maluin kən in mol təwir əm kəm suah un. Saskəlīm-iəkisən e nikim nolən tərət rəha etəmim itəm təmol kəm ik, məto ol təwir əm kəm in, təhmen-pən əm mə İərəməərə təmisaskəlīm-iəkisən nolən tərət rəhatat e nikin, məto in təmol təwir əm kəm kitat. ¹⁴ Nat kəike itəm otəkəike matig e nikitəmat, in nolkeikeən. Otos motuwın-in təhmen-pən mə napən wir rəha Uhgın. Nian onəkotolkeike itəmat min, kən tol itəmat nakoatuwa kitəh. ¹⁵ Otos nəməlinuən rəha Kristo pəs in tətərəməərə e nikitəmat, məto-inu Uhgın təmaun-in itəmat məmə nakotuwa kol kitəh, kən nakoatatig əm e nəməlinuen. Kən nian rafin otən kəm Uhgın məmə nikitəmat tətəgien o natimnat itəm in təmol kəm itəmat.

¹⁶ Otəgətun itəmat min e nəghatən rəha Kristo, kən moatən e nətəligən təwir kəm itəmat min

məmə nəkotəkəike moatol, məsotapəsən. Otan napuən mīn e Naoa rəha Napuən, ne napuən mīn rəha niməfak, ne napuən mīn itəm tətisi-pən e Narmīn Rəha Uhgīn. Otan ilat rafin tahmen-pən e nənwiwiən kit itəm tətisi-pən e nikitəmat matuwīn kəm Uhgīn. Inəh e nolən mīn əh, pəs nəghatən wīr rəha Kristo tətətig matəmegəh matəwiə wīr e nikitəmat e nian mīn rafin. ¹⁷ Natimnat rafin itəm noatol, ne nəghatən mīn rafin itəm noatən, mətə nəkotol əm e nərgi İərəməərə İesu. Kən nian rafin itəmat onəkotəkəike motən kəm Uhgīn, tata rəhatat, məmə nikitəmat tətəgien o natimnat itəm İesu təmol kəm itəmat.

Nolən wi rəha tata, ne mama, ne nisualkələh

¹⁸ Nipitan, otisiai-in nəərəməərən rəha iəguihl mīn rəhatəmat, tahmen-pən əm mə pətan u in iəfak in otəkəike mol mihin.

¹⁹ Kən nəman, otolkeike rəhatəmat nipitagwəhl, kən motol təwīr kəm ilat, mətə əsotolən rəhatəmat nəərəməərən məmə otərəkin rəhatəmat nipitaguihl mīn.

²⁰ Nisualkələh, otisiai-in rəhatəmat tata ne mama, mətə-inu İərəməərə rəhatat nikin otagien o nolən əh.

²¹ Itəmat tata mīn, esotolən nalpīnən taprəkis-in nəratən itəm nisualkələh koatol, məmə nikitat otahmə ron. Mətə okəmə nəkoatol nəhlan elat, kən rəhalat nətəligən in otatite.

Nolən rəha slef ne rəhan iərəməərə

²² Slef mīn, nian rafin onəkotəkəike motol nəwia netəm-iasol mīn rəhatəmat, mətə sənəmə nian

əm itəm ilat koatehm itəmat lan məmə nīkilat otətagien otəmat. Məto itəmat onəkotəkəike motol wək e nikitəmat pahrien rəha nos-ipənən nisiiian kəm Uhgīn. ²³ Wək naka itəm nəkoatol, otol e nikitəmat rafin tahmen-pən əm mə noatol wək rəha Iərəməərə rəhatat, sənəmə noatol wək rəha etəmim əm. ²⁴ Məto-inu onəkotəkəike motitun wir məmə Iərəməərə rəhatat in otos-ipa nətouən ətuatip rəha natimnat min itəm nəkoatol ilat. Nətouən əh Uhgīn tinəmən rəkis məmə otos-ipən kəm nenətin min. ?Kən nəkotitun nat u? Nəkotol wək rəha suah inəh Iərəməərə pahrien rəhatat, in Iərəməərə Kristo. ²⁵ Məto etəmim itəm tatol nolən tərat, in otos ətuatip min noan nətouən rəhan o nolən tərat, məto-inu Uhgīn, in tatol tahmen-ahmen əm kəm netəmim rafin.

4

¹ Netəm-iasol min itəm koatərəməərə, onəkotəkəike motol tətutip kən mahmen kəm rəhatəmat slef min, məto-inu itəmat min nəkotəkəike motitun məmə rəhatəmat min Etəm-iasol in tətatig min əpəh e nego e neai.

Pol təməgətun ilat

² Itəmat onəkotəkəike moatəghat-pən kəm Uhgīn e nəfakən e nian rafin. Kən nian onakoatəfak, rəhatəmat nətəligən otəkəike mətətig lan, kən nian rafin agin nəkotəkəike moatən kəm Uhgīn məmə nikitəmat tətəgien o natimnat itəm in təmol kəm itəmat. ³ Kən io iakolkeike məmə itəmat nəkotəkəike motəfak min otimat min, məmə Uhgīn

3:22: Efes 6:5-8
Efes 6:18; Fil 4:6

3:25: Rom 2:11

4:1: Efes 6:9

4:2:

oteräh e suatip mə ekotən-iarəp nalpəkau an-ionən rəha Uhgın e Kristo. Məto-inu ematən-iarəp nəghatən u inu kən kahtosig-in-pən io ron e kalapus. ⁴ Otəfak məmə iatən-iarəp nəghatən əh tətuatip kən məpiə wır tahmen əm mə ekəike mol mihin.

⁵ Itəmat netəm noatəfak, pəs netəm kəsotəfakən kotehm-pən Iesu e nolən min rəhatəmat, kən e nian rafin onəkotəkəike moatehm wır mə nolən, ne nəghatən min rəhatəmat in otiuw Iaihlua min kotuwa o Iesu. ⁶ Itəmat nəkotəkəike moatəghat wır kəm ilat e nəghatən min əm u itəm təwır kən mətehen, kən pəs ilat okotəto nəghatən min əh mə kotəwır. Kən itəmat onəkotəkəike motitun wır suatip min o nuhalpınən nəghatən min rəhalat itəm koatəpəh o rəhatəmat nahatətən o Iesu.

Pol təmahl-ipən təs mil katian olat

⁷⁻⁸ Etahl-ipinə piətət etəm təwır, Tikikas, in tatımnə otəmat o nat kəiu əm məmə in otamnus nəghatən rafin rəhatımat kəm itəmat, kən in otol nikitəmat təmegəh. In piətət kit itəm io ekolkeike pik. Nian rafin in tatətul matip o nasituən lak e wək rəha İərəmərə. ⁹ In tatımnə ilau piətət Onesimas. Nian rafin in tətahatətə əskasik e Iesu, kən itımat ekotolkeike pik in. In etəmim kit rəhatəmat. İlau okuən kəm itəmat namnusən rəha natımnat rafin ikın-u.

Namnun nəghatən rəha Pol təmuwin kəm ilat

¹⁰ Aristakas in tətatig e kalapus itımlau min. In tətahl-ipinə nəghatən wır kəm itəmat. Kən Mak,

4:3: Rom 15:30; Efes 6:19 **4:5:** Efes 5:15-16 **4:6:** Efes 4:29;
1 Pita 3:15 **4:7-8:** Efes 6:21-22 **4:9:** Flm 10-12

in pia Panapas, in min tətahl-ipinə nəghatən wir rəhan kəm itəmat. Itəmat nənamotos rəkis rəhak nəghatən ron. Okəmə in otimnə rəhatəmat ikin, kən nakotit motuwın moatehm wir. ¹¹ Kən Josua Jastas, in min tətahl-ipinə nəghatən wir rəhan kəm itəmat. E noanol min rəha Isrel itəm koatahatətə e Iesu, suah miləhal əm əh, iləhal kətəhalasitu lak o wək rəha nego rəha Uhgın. Kən suah miləhal əh, iləhal kətəhalasitu pik lak e nian əskasik min itəm tatuwa e rəhak nəmegəhən.

¹² Epafra in rəhatəmat kit etəmim, in min tətahl-ipinə nəghatən wir kəm itəmat. In etəmim kit nian rafin tatol wək rəha Iesu Kristo, kən e nian rafin in tatəfak əskasik otəmat. In tatətapəh o Uhgın məmə itəmat onakoatətul əskasik kən motimətə motitun wir natimnat rafin itəm Uhgın tolkeike. ¹³ Ekitun nənən kəm itəmat məmə suah u in tatol wək əskasik o nasituən etəmat, ne netəm Laotisia, ne netəm Hierapolis. ¹⁴ Tokita Luk etəm kitat kotalkeike pik, ne suah u Temas, ilau min katuahl-ipinə nəghatən wir kəm itəmat.

¹⁵ Otahl-ipən min rəhak nəghatən wir kəm piətət ne winitat min əpəh Laotisia, ne pətan əh Nimfa, ne netəm koatəfak e nian min rafin əh rəhan ikin. ¹⁶ Məto e nian onəkotafin rəkis rəhak naoa un, kən motəike motahl-ipən kəm netəm Laotisia mə ilat okotafin min kəm netəmim rəha niməfak əh-ikin. Kən e nolən kitiah min, itəmat onəkotəkəike motafin min naoa rəha netəm Laotisia. ¹⁷ Kən itəmat nəkotəkəike motən-ipən kəm Akipas məmə in otəkəike mol rafin wək itəm Iərəməərə rəhatat in təmos-ipən kəm in məmə otol.

4:10: Wək 12:12; 13:13; 15:37-39; 2 Tim 4:11
Flm 23-24

4:14: Kol 1:7;

4:17: Flm 2

¹⁸ Io Pol, iatos pen matəte əm e nelmæk nəghatən u rəha nənən təwır kəm itəmat. Sotaluinən sen itəm kəməlis io lan e kalapus. Pəs Uhgın ota-situ etəmat kən mawte-in rəhan nəwırən tətətig otəmat.

North Tanna New Testament
The New Testament in the North Tanna Language of
Vanuatu
Le Nouveau Testament dans la langue du Nord Tanna
de Vanuatu

copyright © 2010 Wycliffe Bible Translators, Inc.

Language: North Tanna

Translation by: Wycliffe Bible Translators

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-03-11

PDF generated using Haiola and XeLaTeX on 22 Feb 2024 from source files dated 31 Aug 2023

46e9a2b5-26b8-5301-a079-623f3a20ef8b